

周  
官  
指  
掌

周官指掌卷二

莊有可著

稍里地數第三十一

稍地邑居方位經界治地官祿上乘之法皆如  
甸地稍地者家邑之田一名家削家者王朝之  
官自公孤至下士之采邑也削者削也剖析詳  
密無微不至有位於朝卽有采於邑也稍地包  
甸地方六百里去甸內方四百里爲方里者二  
十萬而制六十四都則面十六都也猶餘不及

六都之地

家邑分地總數第三十二

王官自三公以下不封都鄙邦國者皆謂之家  
居其官治其事卽食其祿卽有內外諸侯兼官  
者亦食其祿也故定名曰家邑王朝不專制其  
地治之官故不可爲公邑非有封地亦不可云  
都鄙也其祿公食一都臣其都大夫以下孤食  
二縣卿食一縣皆臣其縣正以下中大夫食二  
甸下大夫食一甸皆臣其甸師以下上士食二

上中士食一上皆臣其上長以下下士食二邑  
臣其邑宰雖爲臣猶與不臣者同受正於公司  
馬也其祿共食二百六十一縣二邑凡家邑之  
祿不世惟特錫若加田無常法凡稍地六十四  
都共二百五十六縣家邑不足則以甸地公邑  
爲家邑

稍地地治之官稅斂官祿總數第三十三  
稍地六十四都都大夫六十四人縣正二百五  
十六人甸師千二十四人上長四千九十六人

邑宰萬六千三百八十四人并長六萬五千五百三十六人民五十二萬四千二百八十八夫耕公田五百二十四萬二千八百八十畝都大夫以下其爵皆與甸同其祿共三百十七萬四千四百畝征其十二實食祿二百五十三萬九十五百二十畝餘六十三萬四千八百八十畝爲家采其公斂每上百畝共四十萬九千六百畝

家乘家采總數第三十四

家乘者上乘也天子十二家三公三孤六卿其  
大家也朝官家邑除上乘與治地官祿方爲食  
采公一都具六十四乘孤二縣具三十二乘卿  
一縣具十六乘中大夫八乘下大夫四乘上士  
二乘中士一乘下士二人合具一乘凡乘不得  
過制雖公之尊六十四乘而已每上公田千二  
百八十畝除地治官祿共六百二十畝餘六百  
六十畝以四百畝具上乘以百畝爲十二之征  
餘百六十畝爲一上采食下士兩邑實食亦八

十畝也公乘不足則取於家家邑不足則取於  
甸家國所以相通也家無私乘公不制采公私  
所以立辨也攝試之官不敢食其祿邑死亡之  
臣不卽收其田里所以勵廉而長厚也

都鄙里數第三十五

包稍地方八百里者小都之縣地也包小都方  
千里者大都之縣地也縣地方百里者二十八  
畱地方百里者三十六共方百里者六十四凡  
建大中小都三等凡三十九國凡爲方百里者

五十七餘方百里者七爲閒田閒田歸於甸或有爲懿親湯沐邑者謂之加田

三都封地里數爵等國數第三十六

凡王畿都鄙大都方百里者四中都方百里者二俱在冢地小都方百里在縣地大都中都之封不方二百里方百四十里者以其環衛王畿爲封冢之守故也大都之爵公中都之爵伯小都之爵子凡三等無侯男爵大都之國三中都之國九小都之國二十七凡三十九國內諸侯

三等者法三辰以象天也外諸侯五等者法五行以象地也內諸侯之城小而封狹者屈於王也其爵尊者王臣之故貴於外侯也

### 三都城制第三十七

大都城方八里爲方里者六十四以四十八里制四十八黨居士又以四里居工二里居賈十里爲學囿社稷朝廟宮室廩庫城涂無郭城面二門門入中都城方六里爲方里者三十六以二十四里制二十四黨居士又以二里居工一

里居賈九里爲學園社稷朝廟宮室廩庫城涂  
無郭城東西各二門南北各一門門六小都城  
方四里其城立門處當各羨出半里許共爲方  
里者十八以十二里制十二黨居士又以一里  
居工半里居賈四里爲學園社稷朝廟宮室廩  
庫城涂無郭城面一門門四

三都附城里制第三十八

大都附城方六十里爲方里者三千六百凡四  
十八黨士民及賈民田三千二百六十六里并

城六十四里共三千三百三十里餘二百七十里除爲溝樹道路墳墓場圃等地餘歸於鄙鄙地方百里爲方里者萬制四十八鄙凡田六千一百二十里并附城地三千六百里餘五百餘里歸於甸中都附城方四十里爲方里者千六百凡二十四黨士民及賈民田千六百三十三里并城三十六里共千六百六十九里又加溝樹道路墳墓場圃等地不足者取於鄙鄙地方八十里爲方里者六千四百制二十四鄙凡田

三千六十里并附城地千六百里約餘千六百里歸於甸小都附城方三十里爲方里者九百凡十二黨士民及賈民田八百一十七里并城十八里共八百三十五里餘六十餘里爲溝樹道路墳墓場圃等地鄙地方六十里爲方里者三千六百制十二鄙凡田千五百三十里并附城地九百里約餘千一百里歸於甸三都無鄉州遂縣者屈於天子也

三都甸地上乘總數第三十九

大都方百里者四爲方里者四萬去鄙地內田  
萬里以二萬一千六百里制百二十甸具四百  
八十乘餘八千餘里爲山林川澤閒田中都方  
百里者二爲方里者二萬去鄙地內田六千四  
百里以萬八百里制六十甸具二百四十乘餘  
四千餘里爲山林川澤閒田小都方百里爲方  
里者萬去鄙地內田三千六百里以五千四百  
里制三十甸具百二十乘餘二千餘里爲山林  
川澤閒田凡三都甸地無都縣大夫每丘都入

二百二十畝若都臣食采於丘則其丘入止百四十畝凡三都有閒田或爲大山林川澤皆王官所治也

三都都官人數第四十

大都大夫三人上士五人中士二十四人下士七十二人中都大夫二人上士四人中士十二人下士三十六人小都大夫一人上士三人中士八人下士十六人大都大夫中有一卿卿三命大夫再命上士一命中下士不命命者命於

天子也凡都官卿食十六丘大夫八丘上士四丘中士二丘下士一丘每丘實食八十畝三都之臣少於畿外小國之臣者畿外之君無不治其地故官多三都之事王官代主者眾故官少也

三都都用王賦總數第四十一

三都惟黨鄙甸所征畝稅共都用大都黨稅四萬五千一百二十畝鄙稅五萬三千二百八十畝甸稅九萬一千八百八十畝共十九萬二百

八十畝中都黨稅二萬二千五百六十畝鄆稅  
二萬六千六百四十畝甸稅四萬五千四百四  
十畝共九萬四千六百四十畝小都黨稅萬一  
千二百八十畝鄆稅萬三千三百二十畝甸稅  
二萬二千二百四十畝共四萬六千八百四十  
畝王賦每丘百畝三都共六十七萬二千畝共  
丁貢地賦皆入於王其疆地十二關之征與大  
山林川澤閒田則仍王官掌之所謂都用者祭  
祀也喪紀也賓客也服御也稍食也芻秣也凡

三都私用之無與於公者也

天下諸侯國數第四十二

王畿之外公三國大侯六國皆州牧也九州故有九牧小侯二十七國皆州監也每州三監伯八十一國亦皆州長也每州九長子二百四十三國男七百二十九國附庸二千一百八十七國而封建徧乎天下達乎九州之外矣凡六服之內九牧二十七監八十一長四十五子三百二十四男千一百二十二附庸凡牧統三監九

長二子其一子在封內六男其四男在封內凡  
監統三長一子四男其四男俱在封內凡長統  
二男俱在封內凡六服內子俱統一男在封內  
凡六服內男俱統一附庸在封內凡附庸專屬  
公者十六專屬侯者八專屬伯者四專屬子者  
亦四專屬男者一惟屬於牧者不他屬監長以  
下各從其長有分屬也凡夷鎮二服約二百子  
三百七十五男各自治其地卽貢食之無屬夷  
禮略也亦於近州州牧監長各有所統也子餘

於二男不足於三十約舉大數且建滅無常不必盡截然也至藩服以外族類眾多不可勝計周之盛時通中國而近夷鎮者或有千餘則亦禮以附庸而已

六服封地里數第四十三

王畿方千里爲方里者百萬三公方五百里者三爲方里者七十五萬六大侯二十七小侯爲方四百里者三十三爲方里者五百二十八萬八十一伯爲方三百里者八十一爲方里者七

百二十九萬共爲方里者千四百三十二萬又三十六子爲方二百里者三十六爲方里者百四十四萬又十五男爲方百里者十五爲方里者十五萬餘方百里者九爲方里者九萬爲王畿外之隙地若名山大川不可封者其子九男三百九附庸千一百二十一俱在公侯伯子男封地之內凡六服之地方四千里爲方里者千六百萬

五等諸侯封國實食里數第四十四

公方五百里爲方里者二十五萬其食者半則自治實食之地爲方里者十二萬五千餘分屬一子四男十六附庸又子屬四附庸四男各屬一附庸共二十四附庸大侯方四百里爲方里者十六萬其食者三之一則自治實食之地爲方里者十萬餘分屬一子二男又於方四百里封外近地屬二男八附庸又子屬四附庸男各一附庸共十六附庸小侯方四百里其自治實食之地爲方里者九萬餘分屬四男八附庸男

各一附庸共十二附庸又於方里者萬爲一男之地外屬於州牧伯方三百里爲方里者九萬其食者三之一則自治實食之地爲方里者六萬餘分屬二男四附庸男一附庸共六附庸子方二百里爲方里者四萬其食者四之一則自治實食之地爲方里者三萬餘分屬四附庸男方百里爲方里者萬其食者四之一則自治實食之地爲方里者七千五百餘屬一附庸附庸方五十里爲方里二千五百此六服內中國封

建之制也雖男必有附庸以備祭祀之爲國賓也

五等諸侯中城里數第四十五

公中城方九里爲方里者八十一公居中城中  
南北六里東西五里爲方里者三十前朝二里  
左祖二里右社二里中宮寢二里左右宮中官  
府之治各二里後市六里左右夾公宮爲府庫  
倉廩閑廡東西各一里前自朝後至市各長六  
里城北東西隅各以六里居工凡十二里餘三

十九里爲百官公治凡服公事者之廛及賓館  
城涂焉城面各一門則侯伯子男同大侯中城  
方七里爲方里者四十九大侯居中城中方五  
里爲方里者二十五其朝寢祖社府庫倉廩閑  
廩以次差小於公一命其後市五里工十里餘  
十四里則百官公治賓館也其有餘地則服公  
事者之私廛無則居於鄉小侯與伯中城俱與  
大侯同小侯居中城中南北五里東西四里爲  
方里者二十其朝寢祖社府庫倉廩閑廩以次

差小於大侯一命其後市四里工八里餘二十  
一里餘與大侯同伯居中城中方四里爲方里  
者十六其府庫倉廩閑廩又差少其後市三里  
工六里餘二十九里其官少公治與服公事者  
俱少餘與侯同子中城方五里爲方里者二十  
五子居中城中南北四里東西三里爲方里者  
十二其朝寢祖社府庫倉廩閑廩以次差小於  
侯伯二命其後市二里工四里餘九里則百官  
公治賓館也餘服公事者居於州男中城里與

子同男居中城中方三里其庫廩等俱少工賈俱在方三里中其工一里賈半里餘十六里其各官之公治服公事者俱少於子過半俱可居中城中餘與子同

五等諸侯外城里數第四十六

公外城包中城加九里面四里半方十八里爲方里者三百二十四除中城城基環涂溝樹方十里得爲方里者二百二十四大侯外城包中城亦加九里面四里半方十六里爲方里者二

百五十六除中城城基環涂溝樹方八里得爲  
方里者百九十二小侯外城包中城加七里面  
三里半方十四里爲方里者百九十六除中城  
城基環涂溝樹方八里得爲方里者百三十二  
伯外城包中城加五里面二里半方十二里爲  
方里者百四十四除中城城基環涂溝樹方八  
里得爲方里者八十子外城包中城亦加五里  
面二里半方十里爲方里者百除中城城基環  
涂溝樹方六里得爲方里者六十四男外城包

中城加三里面里半方八里爲方里者六十四  
除中城城基環涂溝樹亦以方六里計得爲方  
里者二十八

五等諸侯鄉里園游場園方位里數第四  
十七

公三鄉南東西外城各一鄉鄉自中城外至附  
郭皆平列八黨三列而爲黨二十四其餘一黨  
則平列兩半里而不方附城附郭隨地可制也  
八黨中爲中外城出入大道其東西城則八黨

兩旁皆爲大道凡八黨旁加溝涂道路一里共九里八黨前後共三黨又一黨分列爲半黨爲三里半加溝涂半里共四里每鄉自中城外附郭共爲九里者四外北城爲囿游之地囿中有泮水泮水之北爲國學四城隅爲場圃大侯三鄉南外城一鄉亦平列八黨者三其一黨平列兩半里而不方隨地可制也其東西城之鄉則皆五黨附城平列三列之外則爲半黨平列者五而虛其一共十七黨五黨兩旁皆爲自中城

門至外城門大道南道之南北道之北自中城外附郭皆列三黨又半黨南一鄉九里者四而有隙地東西鄉各八里者四而無隙地凡園游場圃大侯以下皆視公爲差小侯二鄉南外城制二十黨六黨平列者三之中爲城門通道兩旁皆直列兩半黨東西城則五黨平列者三之三者外附郭內借中城阻固中城阻固小侯制小不及半里餘爲三黨中阻固適相容也東西城五黨兩旁皆通道伯六州南外城二州每州

以一黨平列爲兩半黨與橫二黨平列三里與縱二黨外附郭內借中城阻固二黨中爲通道東西外城則五黨平列者二之五黨兩旁皆通道子三州南東西外城各一州州中皆通道道兩旁各二黨外阻郭內倚中城阻固二黨之外各以半黨直列爲一黨男六黨南東西外城各二黨二黨中爲通道公三鄉爲方里者百八其固游四十里城北東西隅場圃各從五里衡四里城南東西隅場圃各從四里半衡四里共七

十六里大侯三鄉爲方里者百其圍游三十二里城北東西隅場圃各方四里城南東西隅場圃各從四里衡三里半共六十里小侯二鄉爲方里者六十六其圍游二十四里城北東西隅場圃各從四里衡三里城南東西隅場圃各方三里共四十二里伯六州爲方里者三十八其圍游十六里城北東西隅場圃各從三里衡二里城南東西隅場圃各方二里共二十里子三州爲方里者十八其圍游十二里城四隅場圃

共十六里男六黨爲方里者七里又半里子男  
無郊縣鄙之民與州黨俱在外城子州十八里  
者縣亦十八里餘爲囿游場圃諸侯州黨不能如  
鄙亦七里半餘爲囿游場圃諸侯州黨不能如  
天子方位之正者限於地也惟天子方正於天  
下諸侯不能不屈以相就也子男無郊略也其  
士民徒民之制未嘗不備也諸侯外城之門皆  
如其命數

五等諸侯鄉遂田里第四十八

公鄉田方九十里爲方里者八千一百除環郭  
溝樹阻固方十九里爲方里者三百六十一其  
士田宅田賈田爲方里者五千三百餘方里者  
二千四百四十遂田方百四十里爲方里者萬  
九千六百爲三遂共爲方里者九千六百并鄉  
田八千一百餘方里者千九百凡鄉遂田共餘  
方里者四千三百四十大侯鄉田方八十里爲  
方里者六千四百除環郭溝樹阻固方十七里  
爲方里者二百八十九其士田宅田賈田爲方

里者五千二百五十餘爲方里者八百六十遂  
田方百三十里爲方里者萬六千九百爲三遂  
共爲方里者九千六百并鄉田六千四百餘爲  
方里者九百凡鄉遂田共餘方里者千七百六  
十小侯鄉田方七十里爲方里者四千九百除  
環郭溝樹阻固方十五里爲方里者二百二十  
五其士田宅田賈田爲方里者三千五百四十  
餘爲方里者千一百三十五遂田方百二十里  
爲方里者萬四千四百爲二遂并爲方里者六

千四百并鄉田四千九百餘爲方里者三千一百凡鄉遂田共餘方里者四千二百四十伯鄉田方六十里爲方里者三千六百除環郭溝樹阻固方十三里爲方里者百六十九其士田宅田賈田爲方里者二千一百五十餘爲方里者千二百八十遂田方九十里爲方里者八千一百爲六縣共爲方里者三千八百四十并鄉田三千六百餘爲方里者六百六十凡鄉遂田共餘方里者千九百四十子田方六十里爲方里

者三千六百除環郭溝樹阻固方十里又半里  
爲方里者百一十其士田宅田賈田爲方里者  
千一百爲三縣爲方里者千八百五十餘方里  
者五百四十男田方四十里爲方里者千六百  
除環郭溝樹阻固方八里又半里爲方里者七  
十二其士田宅田賈田爲方里者四百二十五  
爲六鄙爲方里者七百六十八餘方里者三百  
三十五公大侯三郊無北郊小侯二郊無南北  
郊伯一郊止東郊子男無郊郊者自鄉交遂中

爲畫量立邑成阻固也

五等諸侯甸地三乘軍制第四十九

諸侯甸地公八十縣爲方里者六萬爲軍三爲  
丘千二百八十爲乘如之凡三軍少二百二十  
乘侯六十縣爲方里者四萬五千爲軍二爲丘  
九百六十爲乘如之凡二軍少四十乘伯三十  
六縣爲方里者二萬七千爲軍一爲軍一者爲  
師六也爲丘五百七十六爲乘如之凡六師少  
二十四乘子十八縣爲方里者萬三千五百爲

師三爲丘二百八十八爲乘如之凡三師少十  
二乘男六縣爲方里者四千五百爲師一爲丘  
九十六爲乘如之凡一師少四乘侯二軍次國  
也伯一軍小國也子以下不成軍未成國也男  
僅百乘小之至也凡諸侯甸地制乘皆如天子  
而地治官無都大夫其地亦時與家削都鄙相  
錯雖環列遠郊之外不能方也其王職皆於丘  
乘制貢諸侯不得私自辟地增乘公不得過千  
五百乘侯不得過千乘伯不得過六百乘子不

得過三百乘男不得過百乘

五等諸侯職官人數第五十

公孤一人卿三人大夫五人上士二十七人中  
士八十一人下士二百四十三人大侯卿三人  
大夫五人上士二十四人中士七十二人下士  
二百十六人小侯卿二人大夫五人上士二十  
一人中士六十三人下士百八十九人伯卿二  
人大夫五人上士十五人中士四十五人下士  
百二十五人子卿二人大夫三人上士十五人

下士四十五人男卿二人大夫三人上士五人  
下士十五人公侯伯無中大夫者降於天子也  
子男無中士者未成國又降於公侯伯也其官  
之等衰損益皆因其君之命數皆自然之理也  
其地治之官則因其地而可推也

五等諸侯家邑家乘第五十一

凡諸侯稍地公之孤食一縣卿食二甸大夫一  
甸上士二丘中士一丘下士兩邑侯伯無孤餘  
與公同子男之卿食一甸大夫二丘上士一丘

下士兩邑公之家邑共千二百六十六凡二十  
縣少十四邑凡爲方里者萬五千大侯家邑共  
千八十八凡十八縣少六十邑凡爲方里者萬  
三千五百小侯家邑共九百四十二凡十五縣  
少二十邑凡爲方里者萬一千二百五十伯之  
家邑共六百九十四凡十二縣少七十四邑凡  
爲方里者九千子之家邑共二百六凡四縣少  
五十邑凡爲方里者三千男之家邑共百六凡  
二縣少二十二邑凡爲方里者千五百公一孤

三卿五大夫爲九家孤十六乘卿八乘大夫四乘大侯三卿五大夫爲八家小侯與伯皆二卿五大夫爲七家其具乘與公卿大夫同子男皆二卿三大夫爲五家卿四乘大夫二乘凡家皆不得踰制增乘

五等諸侯都鄙第五十二

凡諸侯都鄙公大都二中都三小都六侯伯與公同子大都三小都六無中都男無都公大都城方五里容二十五甸中都方四里容十六甸

小都方三里容九甸侯伯大都如公中都中都  
如公小都小都方二里容四甸子大都如公小  
都小都與侯伯同凡城方五里者以方五夫爲  
公治方四里者以方四夫爲治方三里者以方  
三夫爲治方二里者以方二夫爲治都城不設  
黨鄙以甸共丘乘公大都百乘中都六十四乘  
小都三十六乘侯伯大都六十四乘中都三十  
六乘小都十六乘子大都三十六乘小都十六  
乘凡都皆諸侯親叔伯兄弟之所封也不世公

之都凡百五十八甸爲方里者二萬八千五百  
侯伯之都凡八十三甸爲方里者萬五千五百  
六十二子之都凡五十一甸爲方里者九千五  
百六十

附庸總制第五十三

附庸中城方三里外城方六里設三黨三鄙官  
有上士二人下士四人甸地兩縣稍地一甸上  
乘三十二爲方五十里大都無郭者臣道也屈  
於君而不暇自固也附庸有郭者國雖小而君

道存也設黨者有君必有師教不可廢也設鄙者不能無役也設官者佐君之道也設甸稍兵衛廩祿皆不可闕也建國之小下至附庸亦具體也

閒田第五十四

凡建國有分土有分民分土者制地是也分民者制室是也然分者制也不能盡分者勢也故人有餘夫或多或寡不能齊也地有殊形或廣或袤不能方也凡建國必依山傍川兼資禽獸

魚鼈山林水草之利故經野制畿必四分井牧而餘其一而人則工商百業亦必四分農事而餘其一蓋六服之內名山大川旣不以封其可封者亦因地制宜室室多則分地盡則闕以不易之法致不窮之治故歷數十世閱千餘歲無大擾攘可無庸損益因之而無弊焉

周官指掌卷二終

周官指掌卷三

莊有可著

宮制第五十五

凡天子之宮有方三百步者有方百二十步者有方九十八十七十六十五十步者始祖之廟前有明堂其宮方三百步也國學之宮前有射堂亦方三百步也大會同大朝覲及巡守殷國所止之地爲壇壝宮皆方三百步也王之大寢后之正內先王羣宮皆方百二十步其在四郊

五帝神兆及王居右社稷神兆其壇壝之方步亦若王之五寢后之餘宮則方九十步也又有太子之東宮庶子之宮及婦御所居之宮凡下宮離宮則方八十步以下也凡公侯伯子男孤卿大夫士其宮之方步者皆如其命數宮也者室外之環垣也垣面有一門南曰南門東曰東門西曰西門北曰北門皆曰宮門亦謂之外門若夫園丘爲壇於地上則徑三百步園圍九百餘步下爲平地不爲壝無宮室方丘爲壇於澤

中則方二百步方圍八百步爲墼謂之澤宮下爲澤涯去水皆面五十步方丘必爲墼如宮者在澤中也亦無室凡神祇兆位在國野者皆無室無室者有事則張帷幕

### 宮室總制第五十六

自天子以至下士皆有寢宮寢宮者正寢也天子謂之大寢諸侯謂之路寢天子大寢面去宮垣三尋環之以牆爲宮中之室室十有二面爲三室其室皆廣六十几深二十几每室外隙地

廣八尋每面三室有四隙地每面中室曰廟室  
門曰廟門廟門皆與宮門相值其門內外向各  
一其門容大扃八个餘入室止有一闌內向無  
門闌小門也容小扃四个南廟室北爲唐唐深  
三尋唐中有屏又北爲闕闕者寢門也亦名中  
門門內曰室皇其狀如畢亦曰畢門門內亦廣  
六十几深二十几亦一室也自門內室北至階  
南深三十六尋廣七十二尋三分其廣中爲堂  
下東爲堂東西爲堂西各廣二十四尋階有二

阼西各十二級級容尺階間爲廷廷南有碑碑  
於堂下之北居五之一階上爲堂堂廣十二筵  
筵外有牆曰序序外堂垂各廣二筵堂深十筵  
八筵至序端序端至堂崇深二筵堂以內爲寢  
室室有三中曰大室方五十四几以北深十四  
几廣五十四几爲梱梱中謂之北堂謂之梱者  
以其爲室之至小而梱逼也一作壺西與北皆  
以版爲牆或爲牖戶冬則瑾東出有階曰側階  
大室中廣五十四几深四十大室之西曰西

夾室東曰東夾室各方四十几環之以墉大室  
一曰房中西夾一曰西房亦曰右房東夾一曰  
東房亦曰左房室者實也房者言戶內之地方  
廣也下側階北行而西至廂北謂之背背深三  
尋其北卽北嚙室之南門也大室之墉南自堂  
之序端而北其堂上東西各八筵大室東西墉  
各四十几南北墉各五十四几其夾室東墉一  
西墉一各四十几南墉二北墉二亦各四十几  
凡堂上五室之墉共百堵外十二室南之東室

曰東塾亦曰左塾西室曰西塾亦曰右塾北之東室曰東房西室曰西房塾者地當寢南執事於寢所孰習也房則以鄰廟室之牆直房之外墉而得名也東西室之南室曰東廂西廂亦曰左廂右廂亦作箱廂者相也室當畢門左右其南牆皆接門室之東西牆於門室之出入有翼相之義也東西室之北室曰東序西序序堂墉也以其南牆直堂上序北而名也東西廟室之中直堂下之南十步之外當廷之碑碑者大寢

之正中因植石以爲識也堂室之南墉西戶東  
牖中爲戶牖之間亦曰牖間亦曰牖前前爲設  
辰之處堂室之北墉中戶東西夾室亦中戶凡  
堂室有戶無門夾室南北墉皆有牖牖之高而  
小者曰向十二室內向皆有牖十二室有門無  
戶大室爲中霤十二室之廟室南曰明堂北曰  
玄堂東曰青陽西曰總章其左右室亦曰左右  
个十二室當十二月王者當月聽政之室也閏  
月則居門終月月者以晦朔弦望正時而成歲

者也月無閏不能成歲宮無門不能成室天子  
因之安寢於寢聽政於室也王宮門阿五雉宮  
隅七雉高丈曰雉廣丈曰堵長九尺曰筵八尺  
曰尋大廂長三尺小廂二尺凡亦二尺凡宮門  
內左右有次次張幕也外左右有舍舍直廬也  
宮四門故入次入舍也舍以巡宮垣之外次以  
宮垣之內凡王宮雖燕寢皆十二室上公之路  
寢方九十步九室無北三室堂東西九筵南北  
七筵序至端五筵宮垣唐俱間二尋室與闕俱

廣五十几深九几九几者二筵也大室方四十  
五几以北九几爲梱東西夾皆方三十六几惟  
堂下深三十六尋容燕射公侯伯路寢皆與王  
同凡燕寢之室皆如命數八命之宮方八十步  
八室東西廟室有一無一堂東西八筵南北六  
筵室與闕廣四十几深八几大室方四十几以  
北八几爲梱垣唐俱間一尋七命之宮方七十  
步七室東西無廟室堂廣七筵深五筵室與闕  
廣三十五几深七几大室方三十五几以北七

凡爲楹垣唐俱間半尋五命者無東西北室不成國燕射以豸侯三命無東西室雖一命有南廟室有中門也惟比長與四家比居民廛而已無異宮

朝制第五十七

凡朝天子外朝在皋門內皋者高也王門之至高而大者也外朝之內爲應門應應龍也卽飛龍也神靈變化畫形於門天子之象也應門之內爲治朝治朝之內爲路門路門畫虎一曰虎

門大人虎變亦象君威之可畏也路門之內東爲東宮世子之宮也西爲大寢之宮一曰西宮亦爲內朝然朝在寢宮則宮而非朝也凡天子之朝皆方百二十步自門至門皆三百步諸侯外朝在庫門內謂之庫者不特社稷宗廟同在門中凡府藏皆在是也外朝之內爲雉門雉文明之物君之道也又性耿介守節不移臣之道也畫雉於門欲諸侯之則而象之也雉門之內爲治朝治朝之內爲路門路門之內爲路寢與

天子同凡天子諸侯皆三門二朝其朝之方步各依命數孤卿以下二門一朝而已

宗廟明堂學宮第五十八

宗尊也宗廟者始祖之廟羣祖之所宗也明堂在宗廟之中故祀於明堂亦曰宗祀宗廟之宮方三百步亦曰大廟以其爲廟之至大也始祖所自出之廟在宮北之西始祖之廟在宮北之東兩廟並列各方百步中爲宮北門之中道南爲明堂其堂蓋方廣三十筵亦有環列之室大

祫時祫及享帝及夏宗見諸侯皆在焉宮中廟外東西又有列室爲毀廟主之祧祧者藏主之室也東室昭主西室穆主學宮方三百步廟方百步樂器所藏且陳者也廟在宮北之東其北之西則瞽宗也瞽宗者祭先師神瞽之廟也樂祖者凡古之司樂者也瞽宗亦如廟制入學舍采見師之禮也采幣也師卽大司樂以下之官祭於瞽宗則舍采焉宮之南爲射堂制如明堂亦曰射宮大射則樂官宿縣焉

民居第五十九

民廩方十步爲方六丈以東西各五尺長六丈者爲比鄰間道隙地爲畜鷄豚狗彘之所以北二步廣五丈者爲內室每丈爲一室環堵之室也凡五室東西室爲庫藏之室中三室爲夫婦所居之室中一室有門南向中三室前二步爲庭院院之東西各一室東室西向西室東向謂之側室爲妾婦所居之室又前二步爲外室則正寢也亦平列五室中三室爲男子所居之室

中爲大室東爲東夾室西爲西夾室皆房也東夾之東爲藏祖考衣冠神主之室西夾之西爲五祀神主之室中室之北出一步爲梱自梱而東下階而北卽內室前之庭院也謂之背中室之南東爲牖西爲戶戶牖之間內爲中霤外爲堂堂方二步東西有墉連室墉曰序堂下兩階各一級容尺堂下一步有門謂之廟門亦曰中門門外一步至於大門謂之外門卽一比之編門也自廟門至外門上有屋皆廣二步自大門

盞堂上共長四步其東西各有二室東爲廚竈之室西爲子弟肄業之所或爲賓館卽塾之類也凡室有穴如圭形以達氣謂之竇亦曰向大者卽牖也

郊社神祇祭祀總制第六十

天子四郊郊有諸神兆位公侯伯雖有郊而無帝望諸神兆冬至祀天於圜丘天之體也夏日至祀地於方丘地之體也兆五帝於四郊天之用也天有三辰是生五行水火木金土分時

化育以成萬物其神謂之五帝古之有天下者  
生爲明王死配五行之帝是以大昊配木炎帝  
配火黃帝配土少昊配金顓頊配水郊上帝則  
以五人帝爲主而配以后稷所以尊其祖也禋  
祀上帝尙精意也其用牛二爲人帝與稷而設  
也位社稷於王朝之右地之用也五祀之神蓋  
亦在焉社者五土之祇稷者百穀之祇五祀者  
五行之官句芒祝融后土蓐收玄冥是也古之  
上公生爲五行之官謂之五正能業其職死爲

貴神少昊氏之子重爲句芒該爲蓐收脩及熙  
爲玄冥顓頊氏之子犁爲祝融共工氏之子句  
龍爲后土後世祀以上公之禮別稱五祀不敢  
與帝同尊也句龍兼配食於社而周棄配稷亦  
上公之禮也孟春祈孟夏雩孟秋賽孟冬蜡季  
冬儺皆所以爲民也故皆行禮於郊天子祀上  
帝主以五人帝而配以稷諸侯則主以五官正  
而亦配以稷尊卑之等也必配以稷凡祀皆爲  
民食也社稷之祭下達於有地治者矣祭神祇

必以人鬼爲主配者天地之化育必有明聖參贊之而後著也門戶竈井中霤大夫以下之五祀天子諸侯謂之小祀非五官之祀也時儺者土王四季四時皆儺惟季冬爲民而儺且一歲之終始也郊在野止主爲民食故儀不求盛嘉樂不野合也日用辛貴升新穀也辛者新也有故而旅上帝爲壇而合祀之也於中國非于郊也季秋萬寶告成大饗帝於明堂備物而配以文王親之也天處高而道下濟爲天子尊親不

可不備也人不離地故社於朝右祭以大牢親之至也園丘祀天主日而配以月方丘祀地主水而配以火日月水火佐天地以生用者也祀天地不主配以人鬼者祭其用者以人成天地之用者人也祭其體者以佐生天地之用者非人也必有主與配者以其有參贊之道也主配皆以人鬼故郊有尸也四望者日月星辰也四類者司中司命風師雨師也四方者畿內之四方也兆山川丘陵墳衍則畿內之地也玉作六

器以禮天地四方禮方明也合諸侯於野則於  
上成之壇設方木以禮六合謂之方明神明之  
也王者有會同大事必盡禮上下神祇其曰禮  
者以玉與牲幣禮而告之非祭祀也猶人有相  
見之禮而非燕饗食也有禮於門者則壇壝宮  
門之外也

宗祖廟數世室第六十一

宗廟始祖之廟百世不遷者也天子有天下諸  
侯有國大夫有家皆有始祖水源木本之義也

謂之宗者羣祖之所宗也統言宗廟而祖廟在其中矣惟崛起爲大夫者無始祖廟大夫死而後其子姓奉爲始祖立廟宗之祖廟者列祖之宮天子上祀六世諸侯上祀四祀大夫士祭其祖考世過則遷者也六世者時王之前爲天子至六世者也四世者時君之前爲諸侯至四世者也祭其祖考者親親之仁也祭及六世四世者尊君之義也而尊卑隆殺之分定矣大夫三廟士一廟士爲宗子則二廟庶人祭於寢旣耕

且畜牲盛備也牲之微者鷄豚犬也王者祭其祖之所自出周人之所獨也先妣者姜嫄也無夫而孕是生后稷實維神異故爲祖之所自出出者言女子之所生也稷既有大功於唐虞至文而受天命至武而有天下故文武爲世室世室者亦世世不遷之室也謂之世室次於始祖之宗也祖無二宗猶樹無二本也周之制也諸侯之世室則惟始封之君或曰後之天子諸侯有大功於天下與其國則亦世室云

廟祧昭穆世系第六十二

廟者列祖未毀之宮列於始祖廟宮之外者也  
祧者凡宮廟大室之西夾安主之室也廟無昭  
穆以世爲限祧有昭穆因主而名昭穆者上序  
祖禰下次子孫一定者也世系者後先繼續名  
位遞嬗無定者也故父子繼世謂之世子系之  
正也祖孫相繼或曾祖孫相繼則系世已變矣  
又有兄弟相繼爲世系者又有世叔父與兄弟  
之子爲世系者又有世叔祖世叔曾祖與兄弟

之孫兄弟之曾孫爲世系者并有先弟後兄爲  
世系者并更有先兄弟之子兄之孫兄之曾孫  
後世叔父從祖祖父族曾王父爲世系者凡世  
系之無定如此然而君臣之分繼統之辭六世  
四世過世則毀王天下君國者重公義後私親  
一成而不可紊也商以前尙質商人奠系世以  
甲乙喪服上止於祖而曾祖無服自曾祖以上  
達於始祖統謂之祖故下達亦統謂之孫周人  
尙文以昭穆奠系世之次則正君臣之分者族

之尊卑長幼亦以之而序又於祖之父加曾祖之稱服以齊衰三月因有曾孫之稱服以緦麻三月自曾祖以上達乎始祖雖亦統謂之祖而下达則統謂之曾孫然而諸侯以下自稱於祖無有敢以曾孫自謂者則猶天子之加稱也會祖之服止齊衰三月者老者已老幼者尙幼既有祖孫之間親愛之情亦俱不能相及也服必齊衰者一本也旁服推之同曾祖之父者情以及見而生又遞親疏之別也自祖以上生不及

喪月者無服不及見不能爲之服也自曾祖而  
上苟能及見一本之誼雖曾祖之祖其可殺於  
齊衰三月乎天子諸侯絕期重君臣之義也太  
夫降期大夫爲族所宗宗亦有君道也尊同不  
降非其君非其宗則君道不存焉耳大夫之降  
亦所以伸君道也凡兄後乎弟長後乎幼又中  
一爲後如兄弟之孫後乎從祖之類稱先君者  
舉其諡其自稱天子曰嗣王某諸侯曰嗣諸侯  
某君臣之辭也不稱族屬之親不敢以一人旁

殺之私加于天下君臣之大義也廟祀次先君之下不敢躋逆君臣之分也弟可先兄兄弟之孫可先從祖而昭穆各從其類宗族世次之別也凡繼體不循世系之正天子上祀六世毀及祖者少矣諸侯四世毀其考者尤少矣卽不幸而有之天子之斬六更諸侯之斬四更先君有知緣天下一國臣民尊祀其君之義不得不辭廟而就毀也至於時王時君爲子孫者禮有大祫以通其變而盡其誠固且百世享之非如大

夫以下之一毀而不復祭之比也且繼統苟非世系之正則凡庶子庶孫未承大統固不敢禰其君既承大統止重執君臣之義故已毀者不可復立當毀者亦不敢不毀也

### 禰廟第六十三

禰邇也於所祭之人鬼情義爲最切近也古者生曰父死曰考不曰考而曰禰禰不止於考也父死子繼父爲禰廟兄終弟及兄爲禰廟世子蚤卒世子之子嗣位則祖爲禰廟世子既卒世

子之子又卒世子之孫嗣位則曾祖爲禰廟凡  
嗣位者皆禰其所嗣之君者也是故舜禰堯禹  
禰舜腓鯀雖爲天子之父舜禹不得禰也別立  
宮而祀之祀以天子之禮不得加以天子之號  
禮一人之私也可自盡也號天下臣民之公也  
不容濫也故世子卒世子之子嗣位不敢追尊  
世子并不敢列廟於羣宮以世子無其實不能  
冒其名廁其位也王者以公天下爲孝不敢欺  
天下臣民尤不敢設虛美以欺其先也大夫士

直以考爲禰廟不世不嫌也

宗制第六十四

大夫無君道有宗道宗也者尊也以族得民族人尊之以爲主也故禮爲宗子服齊衰三月凡公侯伯之大夫三命爲卿受位於王朝王賜之氏以氏其族而有其家大夫死其子姓奉爲始祖立廟宗之百世不遷其適之子孫世爲宗子以主之宗子雖爲士庶人無弗宗也同宗之支子庶子爲大夫受位賜氏有家立廟則別乎大

宗而爲小宗亦百世不遷其子姓奉爲始祖宗其適子孫爲宗子非爲大夫雖本支百世不二宗也宗子爲大夫下賜氏別族大夫死祀過二世廟仍毀不去大宗而爲小宗也二世者祖考也士庶人無宗者祭其祖考而已天子之兄弟爲諸侯者不敢宗天子以其兄弟之適或長爲宗無則已諸侯之兄弟爲大夫者不敢宗諸侯以其兄弟之適或長爲宗無則已宗之尊次於君者也是故上帝爲日月星辰之宗天神之宗

周官指掌

卷三

七

也后土爲山川陵谷之宗地祇之宗也始祖爲  
廟祧祖禰之宗人鬼之宗也天子爲天下之宗  
諸侯爲封內之宗大夫爲家族之宗人之宗也

追享朝享祠禴嘗烝肆獻裸饋食第六十

五

追享享先妣也朝享享先祖也祠禴嘗烝時事  
也肆獻裸肆享也饋食薦新也先妣者姜嫄也  
享先妣者禘也以先祖配於其廟先祖者始祖  
后稷也統言之則羣宮亦曰先祖禘以仲春歲

一祭謂之禘者帝出乎震也享先祖者時禘也  
先祖春配先妣不特祠夏秋冬享于其廟禴以  
世室文武配嘗以未毀廟之祖歲次當配者及  
時王之禴配烝合世室及未毀廟及有功之臣  
配凡享先祖無無配者凡時事享世室及六世  
之主非享配先祖皆特祀肆享者大享也卽大  
禘也合毀廟未毀廟之祖而享於明堂以配先  
祖也大禘以秋或冬嗣王三年喪畢新主旣吉  
祭將毀廟遷祖而正主於其廟必先合羣祖而

見乎其先世見之義也薦新於室不祿無朝踐  
以前之禮凡六世之主秋配享乎先祖禴歲配  
二世再歲一配二世祖與禴祖合配先祖也三  
世三歲一配三世祖與禴主合配先祖也四世  
四歲一配則四世主合二世與禴配先祖也五  
世五歲一配則五世主合禴配先祖也六世六  
歲一配則六世主合三世二世與禴配先祖也  
自是而後七歲禴配八歲合四世二世與禴配  
九歲三世與禴配十歲合五世二世與禴配十

一歲禰配十二歲當合六世四世二世與禰配緣先祖之意合未毀廟之主而享之明堂此之謂間祀此之謂朝享朝享也者六世之尸配於始祖有朝義也其疏數之制以時王遠近之情起義者也毀廟於情義旣疏故止世見也禘與時禴不備物嘗烝肆享必備物饋食惟時物不備物不敢褻也尊之至也必備物不敢略也禮之盛也惟時物不敢忘也情之愛也故先妣歲一祭尊也先祖無不配敬也六世皆時祀親也

禘祖尤親故仲秋雖配祖而季秋又特祀也仲冬合祀配及有功之臣冬爲一歲之終故合祀以告成且以明德之逮下而無不報也

饗十二獻食十二舉燕問脩右第六十六  
宗廟之事首裸將王壹裸后載裸同姓臣爲長者壹酢裸異姓臣爲客者載酢裸裸獻四降神也次朝踐尸入卽位王壹獻后再獻長壹昨獻客載昨獻朝獻四祭者見尸如朝見也次饋食王又壹獻后又載獻長又壹昨客又載昨饋獻

四因饋食而獻也凡十二獻王與后共二裸四  
獻同異姓臣共六昨此正獻也凡祭尊無二上  
正獻者獻先祖之正位乎上者也獻而謂之昨  
者君臣之辭正名分定也正獻畢爲加獻加獻  
始及配享之祖加獻畢羞獻羞獻者旅酬也肆  
享及毀廟與冬烝皆有世室之尸故羞獻始及  
未毀廟六尸羞獻畢爵無算若王大會同巡守  
而諸侯饗王則伯壹裸牧載裸監三裸長四裸  
朝獻饋獻亦如之此正獻十二也裸皆名昨皆

臣也加獻羞獻獻及王之從者矣而子男附庸亦與焉爵無算則徧及王之士庶子矣而列侯之命孤卿亦與焉王饗諸侯上公王壹裸后載裸豕宰昨踐獻饋獻亦如之凡九獻侯伯王裸豕宰昨踐獻王后各一宰昨饋獻亦王后各一宰不昨凡七獻子男王裸踐饋王后俱各一獻凡五獻皆正獻也加獻羞獻及於介矣饗禮止正獻無加羞食禮無裸踐有加羞燕禮無正獻饗訓共儉主行禮也燕示慈惠貴達情也祭無

不備孝子之事其先無所不盡也凡諸侯以下  
祀先獻禮皆從命數公再裸而昨侯伯一裸而  
昨子男一裸大夫士之祀三命以下皆三獻無  
裸而醑雖一命亦三獻主人主婦各一獻不可  
減故上達也燕禮射禮鄉賓興皆一獻也雖大  
射亦一獻禮意專於射也興賢能以一獻士未  
命也宗廟之事夫婦親之設贊佐君臣也有子  
姓父子也兄弟戚在也賓朋友之道也祭備五  
倫孝子之志也鬱齊獻酌者以成初滓泛之酒

和以鬱金香草染以明水煮以明火將裸酌於  
彝舟實於圭璋而裸也獻莫重於裸故曰獻酌  
酒曰酌猶桑曰盛也醴齊縮酌者以一宿汁滓  
相將之酒束菁茅實齊於茅中和以明水包而  
漚之以爲朝獻之尊也盎齊浼酌者以去糟白  
酒浼以井水以爲饋獻之尊也井水者玄酒也  
其曰凡酒則緹齊爲加獻沈齊爲羞獻脩酒器  
名脩酌者盛酒於脩獻以待酌也五齊皆秬黍  
爲之三酒不以秬黍無算之爵也鬱香草氣之

美者也明水火取於日月潔之至也玄酒取於地中澄之至也秬黍嘉穀之貴者也其鬯則所謂鬯瓢脩散也裸獨用概以和鬱而殊其器也八尊者四尊加四鬯爲八也王后裸玉以圭瓚諸臣昨以璋瓚舟不言彝彝不言尊璋瓚無明文助祭之器不貴故略也所謂瑤爵亦加獻之爵王不言瑤略其細也后不言玉統於裸獻也皆互文也祭而饋食食禮之至大也大食之禮尸十二舉一飯三侑諸侯之舉各從命數再飯

三侑大夫以下三飯三侑王食日一舉齊則食  
三舉大食亦十二舉一飯三侑食必祭不忘本  
也食必舉所以行禮也所以重禮而輕食也舉  
必以肺周所尙也舉則食之所謂食舉也舉而  
不食振瘠加所者不在舉內也六牲有肺者固  
有舉矣又或禽獸兼取時田其名物亦未易盡  
詳耳日食一舉常食之禮也齊食三舉敬交神  
明食必潔新不敢餒也有故不舉有不安於心  
雖食不甘也問皆以脩敬之而重其至故用秬

鬯之酒也右也者尊也凡堂南鄉戶西牖東以  
右爲上祭祀則尸席在戶西南鄉大享則主尸  
戶西南鄉毀廟羣主無尸皆在戶西南列東鄉  
羣尸牖東東列南鄉饗食燕皆賓席在尸西饋  
食于室尸席亦在西南皆右而尊之也筵國賓  
於牖前則醴賓也非右賓也于牖前亦如之者  
亦設席再重如昨席也諸侯祭祀席主祭于其  
國之席也昨席助祭於王之席也右亦如之者  
尸賓之位在戶之西故祝與相者贊使右也南

鄉君道也分左右賓主之禮也享禮不食食禮不飲燕止一獻禮各有當也宗廟之事兼用之孝之至也

朝覲宗遇會同第六十七

凡諸侯見天子春於治朝曰朝夏於宗廟明堂曰宗秋於大寢曰覲冬於國學射堂曰遇王大合諸侯曰會諸侯旅見曰同凡六者皆朝也惟治朝爲正朝故曰朝宗尊之也覲親之也遇客之也大合諸侯爲壇國外示天下以公也凡諸

侯伯牧監長朝見其屬封內附庸歲壹見屬男  
二歲一見屬子三歲一見六服外夷鎮子男統  
於方牧者四歲一見其伯牧監長邦交世相朝  
也凡諸侯相朝聘盟會赴告不踰其方岳相維  
之國凡諸侯相朝皆特見惟封內附庸可旅見  
凡諸侯祭其先其四世之尸配享大廟其歲次  
如朝屬之禮其合毀廟大祫亦如世朝之禮

周官指掌卷三終